


# **Vischnaunca da Medel/Lucmagn**



**Reglament da fatschenta  
per la  
vischnaunca da Medel/Lucmagn**

## **I. Determinaziuns generalas**

---

### **Art. 1 Intschess pertuccau e cumpetenzas**

<sup>1</sup> Il present reglament da fatschenta vala per tuttas autoritads, cumissiuns e delegaziuns communalas, aschinavon che prescripziuns specialas stipuleschan buca enzatgei auter.

<sup>2</sup> Las cumpetenzas ed obligaziuns dallas autoritads communalas sedrezzan suenter las prescripziuns dalla constituziun communal e dallas leschas e reglaments communalas.

### **Art. 2 Presenza e cumpetenza da decider**

<sup>1</sup> Scadin commember d'ina autoritad, cumissiun ni delegaziun communal e obligaus d'assister allas sedutas da quellas. Perstgisas motivadas ein da comunicar ad uras al president pertuccau.

<sup>2</sup> In'authoritad, cumissiun ni delegaziun communal e cumpetenta da decider, sche la pluralitad dils commembers respectiv il diember fixaus tenor constituziun communal e presents.

<sup>3</sup> Las sedutas dallas autoritads, cumissiuns e delegaziuns ein buca publicas.

<sup>4</sup> Scadin commember d'ina autoritad u cumissiun e obligaus da votar.

### **Art. 3 Recusaziun**

Eventualas damondas da recusaziun el senn d'art. 11 dalla constituziun communal vegnan examinadas e decididas all'entschatta dalla tractaziun d'ina fatschenta en assenza dils pertuccai.

### **Art. 4 Protocol**

<sup>1</sup> Mintga autoritad communal, cumissiun u delegaziun meina sur las tractaziuns e decisziuns in protocol separau. Las cumissiuns e delegaziuns elegian sezzas igl actuar.

<sup>2</sup> Il protocol vegn tarmess tier als commembers. Ella proxima seduta vegn il protocol dalla seduta precedentia approbaus.

<sup>3</sup> Ils protocols d'authoritads, cumissiuns sco era da delegaziuns communalas vegnan surdai all'administraziun communal.

<sup>4</sup> La suprastanza communal obtegn mintgamai il protocol per orientaziun.

## **II. La suprstonza**

---

### **Art. 5 Departaments**

Ils differents roms d'administraziun communal vegnan reparti sin las suandontas spartas:

- a) **Administraziun generala**
  - administraziun
  - uffeci da baghegiar
  
- b) **Segirtad publica**
  - register funsil
  - mesiraziun e terminaziun
  - polizia
  - pumpiers e polizia da fiug
  - cantunaments
  - fatgs da tir
  - protecziun civila
  
- c) **Scolaziun**
  
- d) **Cultura e temps liber**
  
- e) **Sanitad**
  
- f) **Beinstar social**
  
- g) **Traffic**
  - vias
  - illuminaziun da vias
  
- h) **Ambient e planisaziun**
  - aquaducts
  - serenera e canalisaziun
  - rumians e deponias
  - fatgs da santeri e sepultura
  - survetsch da lavinas
  - dismessa da cadavers
  - planisaziun locala

- i) **Economia**
- agricultura
  - economia forestala
  - resgia communal
  - catscha e pesca
  - turissem
  - industria, mistregn e commerci
- j) **Finanzas**

### **Art . 6 Gliesta da tractandas**

L'invitaziun cun la gliesta da tractandas vegn repartida sil pli tard dus dis avon la seduta a mintga suprastont ed al president dalla cumissiun da quen e gestiun per orientaziun.

### **Art . 7 Acts**

Ils acts tier las diversas tractandas vegnan tenor pusseivladad reparti als suprastonts ensemen cun l'invitaziun alla seduta. D'acts specials (projects, plans etc.) sa vegnir priu envesta sin canzlia.

### **Art. 8 Assessurs**

<sup>1</sup> Sin invit dil president communal san il president ni l'entira cumissiun da quen e gestiun, il president ni era l'entira cumissiun predeliberonta, emploiai communal ed autras personas dil fatg prender part dalla seduta da suprastonza cun vusch consultativa.

<sup>2</sup> Il president ni la suprastonza communal decidan schebein ils assessurs ein presents tier la discussiun finala e decisiun.

## **III. Il president communal**

---

### **Art. 9 En general**

Il president communal procura che la vischnaunca ademplescha sias obligaziuns publicas e quellas adossadas ad ella dil stadi. El controllescha l'execuziun dils conclus dils organs communal sco era l'observaziun dalla constituziun, dallas leschas, dils reglaments e dallas ordinaziuns communalas.

## **Art. 10 Gestiu**

Il president communal survigilescha ils conclus pri dils organs communals, rapportescha sur d'eventualas consequenzas che seresultan ordlunder e fa las necessarias propostas per mauns dils organs cumpetents.

## **Art. 11 Coordinaziun dil persunal e dils organs communals**

<sup>1</sup> Il president communal ei responsabels pil persunal communal.

<sup>2</sup> Il president communal procura per ina buna collaboraziun denter las autoritads, cumissiuns, delegaziuns e denter il persunal communal e decida davart eventuals conflicts da cumpetenza.

## **IV. Cumissiun da quen e gestiun**

---

### **Art. 12 Constituziun**

La cumissiun da quen e gestiun serimna el decuors digl empren meins dalla nova perioda d'uffeci sin invitaziun dil president communal tier sia seduta constitutiva. Ella elegia ord siu miez il president ed igl actuar.

### **Art. 13 Cumpetenzas ed incumbensas**

<sup>1</sup> La cumissiun da quen e gestiun ei negin organ executiv e sa era buca cassar ni midar decisiuns dils organs communals. Ella sa far recumandaziuns a bucca ni a scret alla suprastanza ni alla radunonza communal. Leutier sa ella pretender da scadin commember d'ina autoritad, cumissiun ni delegaziun communal sclariment sur da fatschentas, e quei en fuorma d'in rapport a bucca ni a scret.

<sup>2</sup> Ils commembers dalla cumissiun da quen e gestiun san da tut temps prender envesta els protocols, cudischs e documents. Ella survigilescha las fatschentas currentas da gronda impurtonza e vegn informada dalla suprastanza sur da quellas.

<sup>3</sup> Ensemen cun la suprastanza communal examinescha la cumissiun da quen e gestiun il preventiv communal e fa eventualas objecziuns e propostas per mauns dalla suprastanza communal avon che quella approbescha il preventiv per mauns dalla radunonza communal.

<sup>4</sup> La cumissiun da quen e gestiun informescha la suprastanza sur d'irregularitads constatadas. La suprastanza ei obligada da prender las mesiras necessarias. Vegn la suprastanza communal buca suenter a quell'obligaziun, sto la cumissiun da quen e gestiun annunziar il cass al correspondent organ cantunal.

#### **Art. 14 Revisiun externa**

La controlla aritmetica dil quen communal succeda el rom dil credit disponibel tenor il preventiv entras in biro fiduziar ch'exequescha sia lavur en collaboraziun cun la cumissiun da quen e gestiun.

### **V. Cussegl da scola**

---

#### **Art. 15 Incumbensa, funcziun e cumpetenzza**

L'incumbensa, la funcziun e las cumpetenzas dil cussegl da scola sedrezzan tenor art. 46 ed art. 49 dalla constituziun communal.

### **VI. Cumissiun da baghegiar**

---

#### **Art. 16 Survigilanza, funcziun ed incumbensa**

La survigilanza, la funcziun e las incumbensas adossadas alla cumissiun da baghegiar ein descretas ella lescha da baghegiar.

### **VII. Cumissiuns e delegaziuns**

---

#### **Art. 17 Acts ed informaziuns**

La cumissiun ha il dretg da prender envesta da tut ils acts che serefereschjan sin l'incarica surdada ad ella. Ella sa s'informar tier igl ufficial ni emploiau communal responsabel, il qual ei obligaus d'informar la cumissiun aschilunsch che sias informaziuns ein impurtantas per la lavur dalla cumissiun. Suenter consultaziun dalla suprastanza communal sa ella trer tier persunas cumpetentas per tractar damondas specialas.

#### **Art. 18 Finiziun dalla lavur**

La cumissiun presenta sia lavur cun eventualas propostas a scret alla suprastanza communal ni all'autoritat che ha incaricau ella. Sin giaivsch dils commembers dalla cumissiun vegnan era las propostas dalla minoritad presentadas.

### **Art. 19 Restituziun dils acts**

Alla fin dall'incarica dalla cumissiun ston tut ils acts, plans, rapports, corrispondenza ed auter material surdaus alla cumissiun entras officials ed emploiai communal ni entras la canzlia communal vegnir returnai.

### **Art. 20 Suttascripziun**

Conclus d'impurtonza ein da signar dil president e digl actuar.

## **VIII. Determinaziuns finalas**

---

### **Art. 21 Abrogaziun**

Quest reglament da fatschenta remplazza il regulativ da fatschenta per la vischnaunca da Medel/Lucmagn dils 28 da november 1993.

### **Art. 22 Approbaziun e vigur**

Quest reglament ei vegnius approbaus dalla radunonza communal dils 15 da settember 2000 e passa immediat en vigur.

La presidenta communal:

Il canzlist communal:

Anna Bundi-Pally

Valentin Pally